

Tutu é kuvi ūun e táxnūu San Pablu iña Timóteu

Taxnūu Pablu tutú iña Timóteu

¹ Xu'u é Pablú u ne, pustru Jesúcristú u, tsí kuan ō de kû'vé Xuva kō, ña e nakáku ko, ni Jesúcristu, ña é ntantétu ō. ² Taxnūu ú tutú sa'a iña o, Timóteu. Tsí divín é vata kaa i'xá ko kuenta iña Xuva ko, tsi kuínti'xe o Xuva ko kuēnta iña tú'ūn é kaka'an u ni ō. Na naxnuu viko Xuva ko ō. Na ntuntā'ví ini ña o. Na tā'xi ña é kutūvín va'an, divi ña nī Tó'o ko Jesúcristu.

Kuenta tsí víi ña iña tukú nchu'un é ña te nuu é ntaā i

³ Vata tsí ó kaka'an u ni ō da ntíi ú kue'én u ñuú Macedoniá ne, kuan tsí ó kaka'an u ni ō vevíi di: Kutūvín kan ñuú Efesu vata koo é ká'an ni ña tsíkān é ña ku kuan koo nakua'a ña ña'a tukú nchu'un. ⁴ Ká'an ni ña tē ña víi ña kuenta kuentu e ntáka'an ñá'a; ntē ña víi ña kuenta te dóo du'xen ká'an ñá'a kuentu ka'nu iña uváta kuē'en ña. Dotō tsi ntánāa núu ña'a kuenta iña i sá'ā ne, ña kaidiá'vi kue'en tsi é kāda ntaa o tsiñu e tá'xi Xuva kō é víi o é kuinti'xe ko ñā.

⁵ Kuān ó kaka'an u ni ō tsí ntio ko é kuñima kó ta'an ko kanñ nima ko é vā'a o. Ntio ko é kūtuni ko tsí ña tuví nee nuu i é kīni kaa nuu nima ko. Ntio ko é kuinti'xe nti'xe ko Xuva kō. ⁶ Iō ñá'ā é xtuvī mii ña núu i sá'a ne, dotō tsi ntánāa núu ña nuu i é ña kaidiá'vi. ⁷ Ncho víi ña mastrú lei iña Xuva ko, ntá tsi ña ini ña nee iña é ntáka'an ña; ntē ñá ini mii ña nee e ntánakua'a ña ña'a é vāta te dóo ini ña, kuini ña.

⁸ Ntá tsi xo'ō ne, ini ó tsi vá'ā leí san é kade tsiñu ni'i o, vata ō ntío Xuva kō da xtuví ña. ⁹ Ini ó tsi ña ni xtuví Xuva kō leí san iña ña é vā'a, tsí iña ña ntáde é kīni kaa; iña ñā é ña ntáde ntaa; iña ñā é ña ntákuinti'xe i Xuva kō; iña ñā é kīni ntáa; iña ñā é iō kuetsí i; iña ñā é ntáka'an kīni iña Xuva ko; iña ñā e ntaé'ní dí'i i ni uva i; iña ñā e ntaé'ní ña'a

1 TIMOTEO 1:10 2 1 TIMOTEO 1:20

dĩ; ¹⁰ iña ñā e ntákidi ni'i tuku ñadi'i; iña ñā e ntáde kini kaa ni ñatíi ni'i ñā; iña ñā é ntadú'u; iña ñā vete; iña ñā é ntadá'vi ñā'a dovete; iña ñā é ña ntío kue'en i nchu'un é vā'a. ¹¹ Nchu'un é vā'á san ne, ñivi tū'ún va'a iña Xuva ko, ña e dóo ka'nu, ñivi tū'ún va'a e téé tsiñu Xuva kō ko é ká'an ntódo u.

Naku'e o sintiá'vi nta'a Xuva kō, tsi dóo vá'ā ó de ña ni kō

¹² Kanaku'e ú sintiá'vi nta'a Tó'o ko Jesūcristú, ñivi ñā é xntíi ñā ko vata koo é kuvi víi u sá'ā. Tsí ñivi ñā nakaxnúu ñā ko é káda tsiñu ú iña ñā, tsí kada ntaá u, kuíní ñā. ¹³ Kuān te ntuvi dí'na ne, dōó kini ka'án u iña ñā; dōo dé xení u nī ñā kuínti'xe i san, ntá tsi dé ka'nu iní Xuva ko nī ko, tsí ñā ni kutúní ko nee iña é edé u, tsí vata kuínti'xē kó ñā kídaā. ¹⁴ Ntá tsi ñā te nte kaa vá'a o dé Xuva ko nī ko. Tā'xi ñā é kuínti'xe kó ñā. Tā'xi ñā é kuínimá ko ta'an kó dī, tsí kuān ó kata'xi Jesucristu da kúvi uun tsi nima ko ni ñā.

¹⁵ Tū'ún sa'á ne, nuu é ntāa ntí'xe ī e dóo nuu á'vi i é kuínti'xe un ntíi ntíi ñā'a sán ne: Kī'xi Jesucristu ñúxivi sa vata koo é nākáku ñā ñā'a, ñā é iō kuetsí i. Xu'ú ne, díi díi ka ka'nu kuetsí ko é un ntíi ntíi ñā'a. ¹⁶ Ntá tsi dí'na u ntúnta'ví ini Xuva kō kó e díi díi ka kini kaa ú, vata koo é kué'é ña kutuni ña kuínti'xe i rkontuvi tsi dóo ki'in itō dé ka'nu ini Jesúcristu ní ko ne, kuan kōo ni'i ñā é vā'á nta'a Xuva kō dī, é kuntoo ña ni ña ntii dañu ntūvi. ¹⁷ Dukuān né, na kūnuu ini ko Xuva ko, ñā é odo nūú ntii dañu ntūvi. Ña kuví ka ñā. Ña kúvi kīni o ñā. Mii tsi ñā é Xuva kō. Ntii dañu ntuvi na kuiko ñu'u o ñā. Ká'an ō tsi dóo ka'nu ñā. Kuan tsi koo na kōo.

¹⁸ Sá'a kakā'án u ni ō é viin, i'xá ko Timoteu, vata tsí ó kaka'an ñā'a kídaā, da tá'xi Espíritū Sántū é ká'an ñā kuenta iña o. Nanū'ún ini o tú'ún é káka'an ñā. Koon ntiin kādan tsiñun iña Xuva ko. ¹⁹ Ná xtuví miin e kuínti'xe o. Ná viin nee nuu i é ñā vá'a kuíní nima o. Tsí iō ñā'a é ña ntáde ña kuenta é káka'án nima ñā ne, xtuví mii ñā e kuínti'xe ña ne, dukuān o nákunáa ña kúñu ñā. ²⁰ Kuan ō kúvi Himeneu ni Aléjandru. Ntādá u ña kuenta ntá'a tó'o

e ña vá'a vata koo é na kuinī ña é ña ka'an ntée ña Xuva kō.

2

Nté koo vii o dá kākā'an ntā'ví ō

¹ Di'na sá'ā ntio ko é vii o: Kákan o nta'a Xuva ko kuēnta iña un ntíí ntíí ña'a; ka'an ntá'ví ó ni ñā. Kákan o dā xe'e ntá'a Xuva kō ne, naku'éle o sintiá'vi nta'a ña kuenta iña ña'á san. ² Ka'an ntá'vi o iña ña tsíñu na'nu i ni ūn ntíí ntíí ña tsíñu i vata koo é vā'á koo kuntoo ō, é diin diin tsi kuntoo ō, da ntánuu iní ko Xuva kō, dá ntáde o da mii ku'ēn tsi é vā'a. ³ Sá'ā é vā'a. Kuan koo e ntío Xuva kō é vii o, xo'o é nakākú kō. ⁴ Tsí ntio ña é nākáku un ntíí ntíí ña'a; ntio ña é kūtú've ña nēe é nuu é ntaā i. ⁵ Tsí uun tsi Xuva ko ni uun tsi ñatíi, ña é kántavá'a ko ni Xuva ko, divi ña é Jesucristu. ⁶ Divi ña xe'é ña ntuvi iña ña e ntá'vi ña kuenta iña kuétsi ko ūn ntíí ntíí o. Ta'xi Xuva kō é kūtuni ko dá xee ntúvi i. ⁷ Ta'xi ña é ká'an ntódo ú tú'ūn sa'a, é víi u pustru ña. Nuú é ntaā i é kākā'an u, ñá tē dovete. Nākaxnúu ña ko é nañē'é u ña é ña te ña Israeé san nēe é nuu é ntaā i, é nañē'é u ña nté koo kuinti'xe ña Xuva kō.

⁸ Kidāā ne, da mí'i ká nataká nuu ña'a, ntio ko é ká'an ntá'ví ñatíi san; ntio ko é ntāa ni'i ña nta'a ña e dóo va'á, ñatíi, ña é vā'á nima í, ña é ña ini kudíin, ña é ña ini naa núu. ⁹ Ñadí'í san ne, ñá ntío ko é vii ñá vatā ó de ñadí'í ña nguii san é da mii tsi e ntaínuú ña oro ni xō'o kití e dóo a'ví i ni dā'ma e dóo a'ví i dí ne, e dóo vá'ā ó ntánadaán ña lasun ña. Tsí kuān ó de ña vata koo é na kiní ña'a san ñá ne, ká'an ña tsí ña te nté kaa va'a ntāa ña. Tsí ntio ko é ká'an ña'a san tsi dóo va'á ña'a ñadí'í san, ¹⁰ tsi ntáde ña é vā'a, tsi sá'ā é vā'á koo víi ñadí'í, ña ntáka'an é ntánuu iní i Xuva kō. ¹¹ Diin diin tsi na kuntoo ña naku'ā a ña; na kuiko ñu'u ñā. ¹² Ñá kaxe'é u itsi é nañē'e ñadí'í san ña'a san má ūkún kán. Ná vā'á o te víi ka'nu ñadí'í san iña ñatíi san; diin diin tsi na kuntō ña. ¹³ Tsí di'na de kú've Xuva ko Adaán ne, da kidāā de kú've ñá Eva. ¹⁴ Tsí ña te Adaán san, ña é éni ntá'ví koó san, tsí ñadí'í san. Ne, divi ñadí'í san é edé ña kuétsi. ¹⁵ Ntá tsi kuān te dóo nto'o ñadí'í san

dá kākū i'xá ña ne, nakakū ña kúñu ña tē ña xtuví mii ñā é kuinti'xe ña Xuva kō; te kuñnima ñā ta'an ña; te vii ña é ntio Xuva kō; te kadā kuení va'a ñā; te vā'á koo vií ña.

3

Nté koo vií ña odo nūú ini ukún san

¹ Uun nuu é ntaā í: xoó ña'a é ntio i é kodo nūú ini ukún ne, uun tsiñu é vā'a é ntio ña. ² Ña odo nūú san ne, kantio é vā'á koo vií ña vata koo é ña ka'an ntée ña'a san ña. Uun tsi ñadi'í ñā koo. Kuenta tsí na vii ñā nee iña e ntáde ña. Na kadā kuení va'ā ñā nee é vii ña. Vá'a koo na vii ñā vata koo é kuiko ñu'u ñā'a san ña. Vá'a koo na vii ñā ñā kaxee kaíto ñi'ni ña ña nú vi'i ña. Vá'a koo na nakuā'a ña ña'a san. ³ Ná ku de kí'vi ñā. Ná ku kada diin ña. Ntē ña ntío ña diu'un é vii ñā da nēé ka nuu i vata koo é ñi'i ña. Dōo vá'a koo na vii ñā ñi ñā'a. Ná ñāa núu ña. Ná ku itsu'ūn ña nté koo ñi'i ñā diu'un. ⁴ Vá'a koo na kadā kú'vē ñā vi'i ña. Na vii ñā vata koo é na kuñti'xe i'xá ña ña, é kuiko ñu'u ñā. ⁵ Tē ñā ini ña nté koo kadā kú'vē ñā vi'i mii ñā ne, nté ntu koo kadā kú'vē ñā ini ukun Xúva kō. ⁶ Ña kúvi vii ñā te vata e ná'a kuinti'xe ña Xuva kō, vata koo é ña kadā kuení ña te dóo ka'nu ña'a ña ne, vata koo é ña ní'i ña é nto'o ña vatā o dé tó'ō e ña vā'á san da dóo ka'nu ncho vii. ⁷ Kantio é kuiko ñu'u ñā'a ña, ña é vāta kuinti'xe i Xuva kō, vata koo é ña ka'an kíni ña iña ña, vata koo é ña ntava núu ña dei tó'ō e ña vā'á san.

Nté koo vií ña'a, ña ntáde tsiñu ini ukun

⁸ Kuan koo na vií ña ntáde tsiñu ini ukún di. Vá'a koo na vii ñā vata koo é na kuiko ñu'u ñā'a ña. Na kúvi ká'an ñā dovete. Ná ku de kí'vi ña ntute tinti'ō. Ná ku vii ñā da nēé ka nuu i vata koo é ñi'i ñā diu'un. ⁹ Na kuñti'xe vá'a ña nchu'un e xtúví Xuva kō é kuinti'xe kō ne, é ñi mii ña tsí ña tuví nee nuu i é ña vā'a e ntáde ña. ¹⁰ Koto nteé nto ña di'na. Tē ña tuví nee nuu i é kíni kaa iña ñā ne, kidáa ne, kúvi vií ña tsiñu ukun. ¹¹ Ñadī'í san dí ne, vá'a koo na vii ñā vata koo é na kuiko ñu'u ñā'a san ñā di. Ná ku ká'an ñā dovete iña tuku ñā'a. Kuenta tsí na vii ñā nee iña e ntáde ña. Na kadā ntaa ña é un ntí'í. ¹² Ña e ntáde tsiñu ini ukún

san ne, uun tsi ñadi'ĩ ñá na kōo. Na vā'á koo kadā kú've ñá iña i'xá ña ni vī'i ña. ¹³ Dīvi ñā é vā'á o ntáde tsiñu ini ukún ne, dōo vā'a koo ka'an ñá'a iña ña. Kidāā ne, ñá kūka'an nuu kué'en tsí ña é ká'an ñá iña e ntákuinti'xe i Jesucristu.

Nuu i e tá'xi Xuva kō é kūtuni ko

¹⁴ Ntío ko é ká'ín kantí'i ú kíkoto ní'ni ú o, ntá tsi kaka'an u ni o sá'á ¹⁵ vata koo é, te kūkuí ka kó ne, kutuni o nté koo víi ña'a, ña e kúvi i'xá Xuva kō, ña ñu'u ini ukún Xuva kō, ña kantíto san. Tsí ña sá'á ne, ntáxió ntii ña, ntánada'an ñā nchu'un é nuu é ntaā í iña Xuva ko. ¹⁶ Dōó ka'nu nti'xe nuu i e tá'xi Xuva kō é kūtuni ko:

Ntii dītó Xuva kō é vata kaa ña'a kaa ña.

Kaka'an Espiritū Sántū tsi dōo vā'á ña.

Ntaíto ánje san ña.

Ntáka'an ntódo ña'a san kuenta iña ña ni ña tuku ñúu.

Kuinti'xe ña'a san ña dá kanñi ñuxiví san.

Naki'i Xuva ko ñā e dukún kán.

4

Iō ña é xtuvī mii ña é kuinti'xe ña

¹ Ná te xū'u o é káka'an Espiritū Sántū san tsí da rkontuví koo ña'a é xtuvī mii ña é kuinti'xe ña, tsi ntáde ña kuenta é káka'an é ña vā'ā san dá kaeni nta'ví ña. Kuntikin ñá nchu'un iña é ña vā'ā san. ² Tekú ña nchú'un sá'a é ntáka'an ñá vete, ña é da mii xū'u i ntáka'an, tsí ña te ntániñi nima i ntáka'an, ña é kuka'xi kué'én nima í vata tē i'xi, é ña kakutuní ka nima í nēe é vā'á, nēe é kīni kaa. ³ Ña tsikán ne, ntáka'an ñá tsi ña kvi tánta'a o. Ntáka'an ñá tsi iō titñ nuu i é ña kvi ká'xi o. Ntá tsi de kú've Xuva kō sa'á iña ko. Xo'ō e ntákuinti'xe ko, xo'ō é ini ó nēe é nuu é ntaā í ne, na nākué'e o sintiá'vi nta'a ña kuenta iña i sá'a. ⁴ Tsi é un nti'i nuū i é edé kú've Xuva kō ne, vā'ā o. Ña kúvi ká'an ó te ña vā'a o. Kí'i o ne, nakué'e o sintiá'vi nta'a Xuva ko kuēnta iña i. ⁵ Tsí kaka'an Xúva kō tsi vā'a ne, nāxnuu viko ña é ká'xi o da nakué'e o sintiá'vi nta'a ña.

Ña e dōo vā'ā ó kade tsiñu iña Jesucristu

⁶ Te nañē'en tá'an o nuu i sá'ā ne, é dōo vá'a viin iña Jesúcristu. Kae'nu é kākuinti'xe o dá kanakuā'an tú'un Xuva ko, divi nchu'un ña é kantikin.

⁷ Ntá tsi ña kún den kuenta é dotō tsi ntáka'an ñá tuntu, é ñā te iña Xuva ko. Nakua'an miin é viin nēe é ntio Xuva kō. ⁸ Kaidiá'vi kudii uun da'na te vii o é kāda tsiñu kúñu kō, ntá tsi dií dií ka kaidiá'vi te vii o é ntio Xuva kō. Tsi sá'ā ne, kaidiá'vi ñi dukuan ntoo o ñūxiví sa ne, kaidiá'vi dá kuntoo o ni ñā kídaā di. ⁹ Nuú é ntaā í sá'a ne, dōo nuu á'vi é kuinti'xe un ntíí ntíí ña'a. ¹⁰ Dukuān ne, dōo ntii ntáde tsiñu o ne, ntánto'o kō e ntádē xení ña'a ni kō, tsí e kuinti'xe ko Xuva kō, ña kantíto, ña é kuvi nakāku un ntíí ntíí ña'a, ni ña é di divi kakuinti'xe i.

¹¹ Sá'a nakuā'an ña'a san. Ká'an ni ña te kuān koo vií ña. ¹² Ná ku dā vá'a o é ká'an ñá'a tsi ñá inin tsí dā vé ña kuetsin. Vá'ā koo viin vata koo é nañē'en ña kuinti'xe i san nté koo vií ña dá kiní ña nté o kaka'án ne, nté o kaden utén uten, nté o kakuinima o tá'an o, nté o kakuinti'xe o Xuva kō ne, nté o kaden é vā'a. ¹³ Ñi dukuan kī'ín u mí tuvín ne, koon ntiin nakuā'an tú'un Xuva ko mē'ñú ña'a san, nañē'en ñá nēe é káni tú'un ne, ku'éen ñā tsi di. ¹⁴ Ná ku dā nēe iní ó xtuvín miin e tá'xi Xuva kō doméni é vā'á koo viin dá ka'an Espiritū Sántu kuēnta iña ñátā sán ura í da xntee tá'an ña nta'a ña diki o.

¹⁵ Dōo ntíto viin é un ntí'i nuū i sá'a. Divi tsi viin vata koo é kīni un ntíí ntíí ña'a tsí kakutú've o e dií dií ka vá'a viin. ¹⁶ Kuenta tsí viin nté o den, nté o kanakuā'an ña'a san. Koon ntiin é un ntí'i. Tsí te kuān koo viin ne, nakākún miin ne, kuan koo nakākún ña ntaíni é kākaka'án di kuenta iña o.

5

Nté koo vií o ni tā'an ko, ña kuinti'xe i

¹ Ná ku dēn tíin ni ñatā san. Ká'an ni ña dokoñu'u vata tsi te uva o ñā. Kuikon ñu'un ñatíi kuetsi sán vata tsi te ēni o. ² Kuikon ñu'un ñadī'í ata san vata tsi te di'í o ñā. Kuikon ñu'un ñadī'í kuetsi san váta tsi te tā'an o ña e dōo vá'a viin ni ñā.

³ Xntiin ñadĩ'i kií san, ña é kátaan núu nti'xe i. ⁴ Ntá tsi te ió i'xá ñadĩ'i kií san ne, o ió i'xa i'xá ña ne, ñivi i'xá san kaduku ntée é vii é vā'a, é vii kuenta dí'i i ni uva i. Sá'ā é ntio Xuva kō é vii o. ⁵ Ñivi ñadĩ'i kií, ña é da mii un ñiki, ña é xoxó kue'en tsi i'xá i ne, ini ña tsí mii tsi Xuva ko kaxntii ña ñā. Nté ntuvi ntē níñu kaka'an ntā'ví ña, kaikan ñá nta'a Xuva ko nēe é kátaan núu ña. ⁶ Ntá tsi ñadĩ'i kií, ña é kade da mií é ntio mií né, vata tsi tē xi'i ñá, kuān te kantíto ká ña. ⁷ Ká'an ni ña nūu i sá'a vata koo é ña tuví nee nuu i é ká'an ntée ña'a ña. ⁸ Ntá tsi te xoó ña'a ña kade ña kuenta ñá'a ña ne, díí díí ka te ñavi'i mii ña ne, é xtuví mii ña e kuínti'xe ña Xuva kō. Díí díí ka xii kaa íña ña é vata kaa uun ña'a, ña é ña ni kuínti'xe kue'en í Xuva kō.

⁹ Da mií é kuntéé ñivi ñadĩ'i san mí uve na'a ñadĩ'i kií tē é xee tá'an uni díko kuia ña, te uun tsi xii ña xio, ¹⁰ te ká'an ñá'a te dóo vá'ā o dé ña, tē nakue'nu vá'a ña i'xá ña, tē dóo vá'ā o dé ña nī ña xee ví'i ña, tē e nákate ña dí'in ña kuínti'xe i, tē e xntíi ña ña ntánto'o i, tē edé ña é uun nti'i nuu i é vā'a.

¹¹ Ntá tsi ña xntéen na'an ñivi ñadĩ'i kií, ña é dā vé ñadĩ'i kuetsi, tsí te xtuví mii ña é káde tsiñu ña iñá Cristú tē ntio ña é nātánta'a xtuku ña ne, ¹² kidáā ne, ní'i ña é ntō'o ña tsí ña ni de ntáa ña é xe' é ña xu'u ña ni Xuva kō é vii ña. ¹³ Ne, ñá te da mii tsi sá'a, tsí kuini ña é kudu'xen ña é káda tsiñu ña ne, da mii kuē'en tsi é kī'in ña ta'an ví'i ta'an ví'i. Ne, ñá te da mii tsi é kada du'xen ñā, tsí kuini ña é ká'an ñá dovete iña ta'an ña. Dá ncho kini nūu ña tsiñu iña ta'an ñá ne, ká'an ña nūu i é ña vá'ā o é ká'an o. ¹⁴ Dukuān é ntio kó ne, na nātánta'a ñadĩ'i kií kuetsi san. Na kōo i'xá ña ne, na kuēnta víi ña ví'i ña. Kidáā ne, ñá vii ñá nēe nuu i é ká'an kini ña'a san íña ña. ¹⁵ Tsí ió ña é xtuví mii ña é vā'a e ntáde ña ne, é kuntikin ña tó'ō e ña vá'ā san ve.

¹⁶ Te uun ñadĩ'i, ña é kakuinti'xe i Xuva kō né, ió ñavi'i ña, ña é ñadĩ'i kií ne, ñivi ña kaduku ntée ña é xntii ña ñā. Kidáā ne, ñá dūku ntee un ntíi ntíi ña ñu'u ini ukún san é xntii ña ñā, vata koo é kuvi xntii ña ñadĩ'i kií, ña é xoxó ñavi'i i.

¹⁷ Kuikon ñu'un ñatā san, ña e ntádē kú'vē va'á ini ukún kán ne, díí díí ka kuikon ñu'un ña e ntáka'an ntódo tú'un

va'á san nī ña ntánakuā'a ña'a sán di. ¹⁸ Tsí kaka'an tú'un Xuva kō: “Ña ku xnúun xo'o xu'u dūntíkí san da ntaédín tí trigu”, ka'an. Ne, kaka'an xtúku: “Da miī é xī'í á'vi ña kade tsiñu”, ka'an.

¹⁹ Ña kún den kuēnta te tsi'i kuétsi ña'a uun ña'a ñatā sán tē xoxó uvi, uni ña'a, ña é ntāda ntaa é kāka'an ñá te nuu é ntaā i.

²⁰ Tē xoó ña'a, ña é kuan tsī o ntāde kuétsi sán ne, kadan tíin ni ña mē'ñu un ntíí ntíí ña'a, vata koo é ū'ví ña nguú san.

²¹ Ká'ān ú ni o nuu Xuva ko ni Jesūcristu ni ánje ñā, ña é nakaxnúu ña, te kādan ntaan é un ntí'í nūu i sá'a. Ña te úun tsi ñā'a é vā'á viin ni ñā, tsí uun kuédadíí tsi. ²² Koton vá'ān dá kadān kú'vén iña ñátā, ña é kodo nūu ini ukún san, vata koo é ña viín dadíin ni tūku ña'a san núu i é kini kaa, tē ña te vá'a ña'a ñatā san. Ña kún den nēe nuu i é kini kaa.

²³ Divín ne, da xé da ta'an tsi kanguntii í'xí o ne, ña kó'ōn kán e dá mii ntute kuíi, tsí ko'on kudiin ntute títí'í'ó dá vata koo é na ntūvá'a í'xí ō.

²⁴ Iō ñá'a ne, dōo dito é iō kuetsí ña di'na dá nī'i ña é ntō'o ña. Iō tūku ña'a ne, dōo xu'u iō kuetsí ña ne, da nté rkontúví kutuni ñá'a tsí iō kuetsí ña. ²⁵ Dadíi tsi ió nuu i é vā'a e dōo ditó ne, ió tuku nuu i é vā'a é ña díto, ntá tsi ña kivi kuxu'ú kue'en tsi.

6

¹ Tē xoó ña'a ña e ntāde tsiñu ne, na kuiko ñu'u ñā tó'o ñā, vata koo é ña ka'an kīni ña'a iña Xuva ko ni nchu'ún ña. ² Tē xoó ña'a iō tó'o i ña kuínti'xe i ne, ñá ku xtuví mii ña é kuiko ñu'u ña ñā tsí e kúvi ña ñā kuenta iñá Cristu. Ñá'ā, tsi díí díí ka vá'a koo na kāda tsiñu ña iña ña, tsí kuinima ñá ña, tsí dadíi tsi ntákuinti'xe ña Xuva ko ni tó'ō tsiñu san.

Kuntōo vá'a o te kuinti'xe kō

Ká'an ni ñā'a sán, nakuā'an ña nuu i sá'a. ³ Tē xoó ña'a nakuā'a ña tuku nchu'ún, tē ña kákuinti'xe ñā tú'ūn é nuu é ntaā i é kāka'an Tó'o ko Jesūcristú, tē ña kantíkin ña

nchu'un é ká'an Xúva kō é vīi ó ne, ⁴ dōó ka'nu ña'a ña, kuiní ña, ntá tsi ña te neé ini ña. Da mii kuē'en tsi é ntio ña é nāa núu ña nuu i é ña kuvi nantíko koó ña'a, e dóo ntio ña naa núu ña. Kidáa ne, kune'u iní ña. Nāa núu ña ni tā'an ña. Ká'an kini ña iña ta'an ña. Kadā kuení kini kaa ña iña ta'an ña. ⁵ Da mii kuē'en tsi é nāa núu ña ni tā'an ña, tsí kini kadē kuení ña. Xtuvī mii ña é kākuinti'xe ña é nuu é ntaā i. Dōó kue'e ní'i ña te kāda tsiñu ña iña Xuva ko, kuiní ña. Kiin nteén xion ña kuān ntāa san. ⁶ Kué'e ní'i nti'xe kó te kada tsiñu o iña Xuva ko, ntá tsi tē nuu e vá'a nima ko. ⁷ Tsí ña te neé kani'i ó dá xee o ñúxiví sa ne, ñá tē neé kuvi kuni'i o tē ntáka o ñúxiví sa di. ⁸ Te ió te ko'lo, te ká'xi ó, te kunuu kutāvi ó ne, é divi tsikan. ⁹ Ntá tsi divi ñā'a, ña e dóo ntio i é kūkuika ne, kade ña nuu i é ini ña tsí ña vá'a ne, ña kúvi ntī ká ña, vata tsí ó kuvi kiti é tāvi tī iō. Kade tuntú ñá nuu i é ncho vií ña ne, ñá katā'an í iña ña. Kunaá iña ña ne, kunaá mii ñā di. ¹⁰ Tē dóo ntio ko diu'ún ne, kidáa vīi o é un ntí'i nūu i é kīni kaa vata koo é ní'i ko. Ió ña'a é ntántuku ñā diu'ún ne, xtuvī mii ña é kuinti'xe ña Xuva kō né, dōo ntánantō'lo ña kúñu ñā.

Koo ntii o kāda tsiñu vá'a o kuēnta iña i é kuinti'xe kō

¹¹ Ntá tsi divin é kādukun nteén Xuva kō né, xtuvīn miin núu i tsíkan; kuntikín nēe e vá'a, nēe e ntío Xuva kō. Kuinti'xe vá'a o. Kuinima ó ta'an o. Na kūtí o nima ó kuntetun. Na kún den kā'nun. ¹² Koon ntiin é na kuinti'xe vá'a o Xuva ko ūun tsi da nté ní'i o ntuví va'á iña o ntii dañu ntúvi. Dukuān e kána Xuva ko ó dá ntādan ntaan mé'ñū ña'a, ña é ini, tsí e kuinti'xe o Cristu. ¹³ Vi'a ve ne, nuu Xúva ko, ñā é kātá'xi ntuví iña ko un ntíí ntīí ó, ní Jesūcristu, ña e dóo vá'a ka'an é nuu é ntaā í da ntitsí ña nuu Pílatú ne, ká'ān ú ni o ¹⁴ te kādan ntaan vātā ó ka'an Xúva kō é vīin. Ña kún den nté uun nuu i é ká'an ñā'a tē ña vá'a o. Kuan tsí koo viin un tsi da nte naínu xtuku Tó'lo ko Jesūcristu. ¹⁵ Tsí tē xee ntúvi i ne, nainu ña é kīni o ña. Divi ñā e dóo va'á kue'en ña. Divi ña kadē kú'vē ña é un ntí'í. Divi ñā é rei é odo nūu un ntíí ntíí rei iña ñúxiví san. Divi ñā é odo nūu ña é da xōó ka tó'lo i. ¹⁶ Da mii tsi ñā é kántító ña ntii dañu ntúvi, é ña kuví ka ña. Kaxi'í nuu

ká'nu ña vata kaa ntuve ñū'u. Ntē xoxó xee étsin i mí tuví ña. Nté uun ña'a vata kiní ña ña; ntē ña kuvi kiní o ñā vevii. Na kuiko ñū'u ña'a ña. Na kodo nūu ñá kadā kú've ñá ntii dañu ntūvi. Kuan tsi koo na kōo.

¹⁷ Ká'an ni ña e dóo iō iña i ñúxivi sa tē ña vií ka'nu ña. Ñá ku dē kuení ña te kūvi vií ña é un ntí'ī tsí iō diu'un ña. ¿Te kūnaá ntu? Ntá tsi na kuinti'xe ña Xuva kō, ña é kata'xi kō é un ntí'i nūu i é kantio kō vata koo é ña te neé taan núu ko. Ntekú ka xtuku é katā'xi ña ko. ¹⁸ Ká'an ni ñā né, na vii ña é vā'a. Na kōó ntii ña é vii ñá nuu i é vā'á vata tsī ó kaxió ntii ñā é kāde tsiñu ña é nī'i ñá diu'un. Ñá ku dē víni ña ni tā'an ña; na kuinī ña é kuē'é ña dava iña ña ña e ntátaan núu i. ¹⁹ Kuan koo naxtūví va'ā ña dokuika iña ña é ña kantí'i iña ntuvi iña ña é ve'xí, vata koo é nī'i ña ntúvi vā'á iña ñá rkontuvi.

I'a ntí'i tūtú iña Timóteu

²⁰ Timoteu, vánchu'un viin kuenta nuu i e tá'xi Xuva kō é viin. Ña kún den kuēnta dá doto tsi ntáka'an ñá'a da ntáka'an ntée ña é nuu é ntaā i, tsi dóo ini ña, ka'an ña; ntá tsi ñá ini ntí'xe ña. ²¹ Iō ñá e ntántikin ña sá'ā né, kūdana ña é ntákuinti'xe ña.

Na naxnuu viko Xuva ko nto ūn ntí' ntí' nto.

Tū'ún xuva kō vatā ó ntáka'an ña ñuú Coatzospan
 New Testament in Mixtec, Coatzospan (MX:miz:Mixtec, Coatzospan)
 copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 27 Sep 2019 from source files dated 19 Sep 2019

8f775598-56d9-56fd-966e-15e054d2f275